

La muntada da l'otgavla cussegliera federala

Reelecziun da la chanceliera federala

DA CLAUDIA CADRUVI / ANR

■ **Damaun reelegia il parlament la «otgavla cussegliera federala». Mo paucs fan stim da l'elecziun da Corina Casanova – malgrà ch'il post da la chanceliera federala empermetta influenza.** Avant quatter onns, il di da sia elecziun, eran plirs Rumantschs e Grischuns viagiads a Berna per festivar cun Casanova. Nagin n'avev sminà la damaun dals 12 da december 2007 ch'il parlament elegia quel di anc ina segunda Grischuna – *Eveline Widmer-Schlumpf*. L'elecziun da la chanceliera federala è perquai sa persa en la sumbriva da la tensiun enturn la dumonda sche *Widmer-Schlumpf* accepta sia elecziun en il cussegl federal.

Perquai èsi er en las medias grischunas i in pau a perder che Casanova è vegnida elegida il 2007 sco emprima Grischuna sin il post da chanceliera federala.

L'impurtanza

«Nagin chapescha tge ch'ins po muventar politicamain da quest

post anora», scriva *Peter Bodemann*, l'antierur president da la ps, en ina columna davart ils cumbats per ils sez en il cussegl federal.

Era l'antierur cusseglier naziunal *Duri Bezzola* di: «Ins na discorra betg per nagut da l'otgavla cussegliera federala.» Casanova na fetschia betg il medem job sco la chanceliera *Angela Merkel* en Germania, ella haja plitost ina funcziun da management. Tant pli saja la chanceliera federala ina persuna cun paisa che haja la pussaivladad da tschentar prioritads tar las fatschentas dal cussegl federal.

La constituziun svizra denominescha la chanzlia federala sco «post da stab dal cussegl federal». La chanceliera ha pia da planisar las fatschentas da la regenza e da survegliar ch'ellas vegnian realisadas. Plinavant vegnan preparadas en la chanzlia las tractativas da la regenza ed ils rapports per maun dal parlament. La chanzlia sustegna er il president da la confederaziun en sia lavur.

Ina ulteriura funcziun: La chanzlia infurmescha la populaziun, per exempel cun il carnet da votaziun. Corina Casanova è scheffa da var 250 emploiads en la chanzlia federala.

L'istorgia

La chanzlia federala exista dapi passa 200 onns. Ella è la pli veglia instituziun federala ed era vegnida creada da Napoleon Bonaparte. L'emprim eran il chancelier federal ed il scarvon bunamain ils sulets emploiads da la confederaziun.

Suenter la fundaziun dal stadi federal il 1848 ha la chanzlia pers in pau sia muntada. Ella aveva da protocollar las sesidas da la regenza e dal parlament e da publicar las leschas. Cun la reforma d'administraziun ils onns sessanta è la muntada da la chanzlia puspè creschida.

Corina Casanova è la 15avla chanceliera federala. Ils chanceliers dal 18avel tschientaner èn restads ditg en uffizi, per exempel l'Appenzellais Johann Ulrich Schiess dal 1848 fin il 1881.



Mo paucs fan stim da l'elecziun da Corina Casanova che vegn reelegida damaun dal parlament. Quai malgrà ch'il post da la chanceliera federala empermetta influenza sco «otgavla cussegliera federala».